

KOMUNIKASHON PA PRENSA

PCN: prima stabil i indeksashon modesto entrante yanüari 2020

Kralendijk- Pensioenfonds Caribisch Nederland (PCN) na aña 2020 lo mantené e prima di penshun na e mesun nivel di aña 2019, ku ta 22% di e salario di esnan liá na e fondo. Den reunionnan ku a tuma lugá siman pasá, direktiva di PCN a tuma e desishon tambe, pa indeksá e penshunnan entrante promé di yanüari 2020 ku un porsentahe di 0,75.

Aunke ku e indeksashon di ménos ku 1 porshentu por parse relativamente modesto, tòg esaki ta nifiká un kompensashon di kasi 70% di e subida di preis. Segun sifra di CBS, preisnan riba e tres islanan huntu a subi 1,1% den e 12 lunanan tras di lomba.

Presidente di e direktiva di PCN, Harald Linkels, ta bisa ku e ta kontentu ku e echo ku, despues di e indekashon na komienso di 2019, e fondo por indeksá atrobe na komienso di 2020. “E fondo a logra un grado di kubertura hopi haltu den transkurso di e aña aki. Banda di esei na final di sèptèmber nos a logra sali for di un periodo di rekuperashon duradero”. Sin embargo, e presidente di e fondo di penshun ta bisa ku PCN tin ku keda kouteloso. “Den transkurso di e aña aki interes na Merka a baha basta konsiderablemente. Esei ta impaktá e grado di kubertura di forma negativo i nos no ta sigur kon e desaroyo aki lo sigui”, segun Linkels ta splika.

Aunke ku e fondo di un banda ta wòrdu impaktá negativamente dor di un interes ku ta bahando, di otro banda e rendimiento di e fondo den 2019 te ku awor aki ta mas ku ekselente. Te ku fin di oktober PCN a realisá un rendimentu di no ménos ku 15% riba su invershonnán.

Ilustrashon: despues di un periodo di preparashon, konstrukshon di e edifisio nobo di PCN lo kuminsá promé ku fin di aña i lo keda kla den 2020.

